

Nunaateqarfiit tiguneqarneranut, tunngavianiit pilersinneqarneranut kiisalu pilerseqqinnejnarneranut tapiissuteqartarneq pillugu Namminersorlutik Oqartussat nalunaarutaat

Nunalerineq pillugu Inatsisartut inatsisaani nr. 5-imi, 2. maj 1996-imeersumi § 11 aamma Nunalerinermik inuussutissarsiornerup siuarsarneqarnissaa pillugu Inatsisartut inatsisaat nr. 6, 2. december 2009-meersumi § 12, imm. 1 nr. 1, naapertorlugit aalajangersarneqarpoq:

Atuuffi

§ 1. Nunaatilinngorlaanut tapersiissutitut pilersitsinerup nalaani tapiissuteqartoqarsinnaavoq.

Imm. 2. Nunaateqarfiup tiguneqarneranut, tunngavianiit pilersinneqarneranut imaluunniit pilerseqqinnejnarneranut ataatsimut ataasiaannarluni taamaallaat tapiissuteqartoqarsinnaavoq.

Imm. 3. Tapiissutit sivisunerpaamik ukiut pingasut ingerlanerini akiliutigineqartassapput.

Imm. 4. Tapiissutit inunnut 21-niit 65-ik ilangullugit ukiulinngut akiliutigineqarsinnaapput.

Inuit tapiiffingineqarsinnaasut

§ 2. Inuit nunalerineq pillugu inatsimmi § 3-mi piumasaqaatinik naammassinnissimasut tapiiffingineqarsinnaapput:

1) nunaateqarfik pioreersoq kisimiillutik imaluunniit ingerlatseqatigiillutik tigussagunikku imaluunniit nunaateqarfik nutaaruinnaq tunngavianiit pilersissagunikku, imaluunniit

2) nunaateqarfik imatut pissusilik tigussagunikku nunaateqarneq imminut akilersinnaasunngortinniarlugu tunngavianiit pilerseqqinnejqartariaqartoq, imaluunniit

3) nunaateqarfik pissutsinik pisariaqavissumik nuuttariaqassagunikku soorlu naatitsinissamat ivigartortitsinissamullu nunaminertanik nutaanik amigaateqarneq assigisaanilluunniit peqquteqartumik.

Imm. 2. Qinnuteqaat, Savaatillit Peqatigiit Suleqatigiissunit, SPS, uppernarsarlugu atsiorneqarsimasoq, Aalisarnermut, Piniarnermut Nunalerinermullu Naalakkersuisoqarfimmum nassiunneqassaaq aamma assilinera kommunimut nunaateqarfiup inissisimaffigisaanut nassiunneqassaaq.

Tapiiffingineqarnissamut piumasaqaatit

§ 3. SPS aamma Nunalerinermik Siunnersorteqarfik isumasioerreerlugit Aalisarnermut, Piniarnermut Nunalerinermullu Naalakkersuisoq tapiissuteqartoqarnissaanik aalajangiissaq. Aalisarnermut, Piniarnermut Nunalerinermullu Naalakkersuisoq aalajangiiniarnermini ilaatigut pingaartissavaa:

- 1) nunalerineq tapiiffingeqartussap siunissami pingarnerutillugu inuussutissarsiutigissagaa. Tamatuma naliliivigineqarnerani nunaateqarfiup annertussusaa tunngavagineqassaaq,
- 2) maskiinat atortut, narsaatit neriniartitsiviillu aamma uumasuutit imminnut naapertuuttumik annertussuseqarnissaat,
- 3) narsaatit pilersinneqareersinnagit imaluunniit pilerseqqinnejareersinnagit ivikkanillu nerukkaatissat siullit pigineqalereersinnagit uumasuuteqartoqalissanngitsoq taakkuluunniit amerlisinneqassanngitsut,
- 4) nunaatillip ingerlatsinermut illuutit ungallullu sanareersimangippagit imaluunniit taakku amerlisinneqassanngitsut kiisalu
- 5) suliaq tapiiffingeqartoq pilersaarutigineqartutut siuariartussasoq.

Imm. 2. Aalisarnermut, Piniarnermut Nunalerinermullu Naalakkersuisup ataasiakkaanut tunngatillugit tunngavilersuutit naleqquttut allat pingarnerutissinnaavai.

§ 4. Tapiissutit amerlassusissaat akiliutigineqartussallu aveqatigiinnissaat kommunip pineqartup Aalisarnermut, Piniarnermut Nunalerinermullu Naalakkersuisup akornanni Nunalerinermik Siunnersorteqarfik isumasioqatigereerlugu isumaqatigiissutigineqassapput.

Tapiissutit unitsinneqarnissaat aamma utertillugit akilerneqarnissaat

§ 5. Aalisarnermut, Piniarnermut Nunalerinermullu Naalakkersuisoq kommuni pineqartoq, SPS aamma Nunalerinermik Siunnersorteqarfik isumasioqatigereerlugit aalajangiisinnaavoq, tapiissutit akiliutigineqartarnerat unitsinneqassasoq

- 1) tapiiffingeqartartup nunalerineq pillugu inatsimmi imaluunniit Inatsisartut nunalerinermik inuussutissarsiornerup siuarsaneqarnissaa pillugu inatsisaani aalajangersakkat unioqqutissimappagit,
- 2) nalunaarut manna malillugu tapiiffingeqartartup tapiissutinik pisarnissaminut pinngitsoornani naammassisassat naammassisinnaajunnaarsimappagit, imaluunniit
- 3) tapiiffingeqartartoq eqqunngitsunik imaluunniit paatsoorneqarsinnaasunik paasissutissiisimappat imaluunniit tapiiffingeqarnissamut paasissutissanik pingaarutilinnik nipangiussisimappat.

Imm. 2. Immikkoortoq 1-imi nr. 1 aamma nr. 3 malillugit tapiissuteqartoqartarunnaarpot Aalisarnermut, Piniarnermut Nunalerinermullu Naalakkersuisoq kommuni najugarineqartoq, SPS aamma Nunalerinermik Siunnersorteqarfik tusarniaavigereerlugit aalajangiisinnaavoq tapiissutigineqarsimasut utertillugit akilersinneqassasut. Naalakkersuisup tapiiffingeqartoq utertillugit akilerneqarnissaat pillugu piumasaqaatinik piffissaliussanillu allakkanik isumaqatigiissuteqarfingisinnavaa.

Atuutilersitsineq

§ 6. Nalunaarut manna 15. september 2016-imi atuutilerpoq.

Imm. 2. Ilutigalugu Savaateqarfinnik pilersitsinernut tapiissuteqartarneq pillugu Namminersornerullutik Oqartussat nalunaarutaat nr. 23, 8. august 1993-imeersoq, atorunnaarsinneqarpoq.

Namminersorlutik Oqartussat, ulloq 5. september 2016

Nikolaj Jeremiassen

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut